

四庫全書

集部

欽定四庫全書

集部

四六法海卷二

詳校官編修_臣李堯棟

侍讀臣孫球覆勘

覆校官中書臣呂雲棟

校對官中書臣孫球

謄錄監生臣陸費鑾

欽定四庫全書

四六法海卷二

明 王志堅 編

謝平原內史表

陸機

陪臣陸機言今月九日魏郡太守遣蕪丞張舍賁板詔
書印綬假臣為平原內史拜受祇竦不知所裁臣機頓
首頓首死罪死罪臣本出自敵國世無先臣宣力之效
才非丘園耿介之秀皇澤廣被惠濟無遠擢自羣萃累
蒙榮進入朝九載厯官有六身登三閤宦成兩宮服冕

乘軒仰齒貴游振景拔迹顧邈同列施重山嶽義足灰
沒遭國顛沛無節可紀雖蒙曠蕩臣獨何顏俛首頓膝
憂愧若厲而橫為故齊王同所見枉陷誣臣與衆人共
作禪文幽執圜圉當為誅始臣之微誠不負天地倉卒
之際慮有逼迫乃與弟雲及散騎侍郎袁瑜中書侍郎
馮熊尚書右丞崔基廷尉正顧榮汝陰太守曹武思所
以獲免陰蒙避迴崎嶇自列片言隻字不關其間事蹤
筆跡皆可推校而一朝翻然更以為罪叢爾之生尚不

足矣區區本懷實有可悲畏逼天威即罪惟謹鉗口結
舌不敢上訴所天莫大之釁日經聖聽肝血之誠終不
一聞所以臨難慷慨而不能不恨恨者唯此而已重蒙
陛下愷悌之宥迴霜收電使不隕越復得扶老攜幼生
出獄戶懷金拖紫退就散輩感恩惟咎五情震悼跼天
踏地若無所容不悟日月之明遂垂曲照雲雨之澤播
及朽瘁忘臣弱才身無足采哀臣零落罪有可察苟削
丹書得夷平民則塵洗天波謗絕衆口臣之始望尚未

至是猥辱天命顯授符虎使春枯之條更與秋蘭垂芳
陸沈之羽復與翔鴻撫翼雖安國免徒起紆青組張敞
亡命坐致朱軒方臣所荷未足為泰豈臣蒙垢含吝所
宜忝竊非臣毀宗夷族所能上報喜懼參并悲慚哽結
拘守常憲當便道之官不得束身奔走稽顙城闕瞻係
天衢馳心輦轂臣不勝屏營延仰謹拜表以聞

機字士衡吳郡人抗之子吳亡歸晉趙王倫輔政引
為相國參軍倫將篡位以為中書郎倫之誅也齊王

同收機等九人付廷尉成都王頴吳王晏救之得減
死機感頴恩遂委身焉頴以機叅大將軍軍事表為
平原內史○此文體之初變者也今讀之猶有漢人
風味

薦譙元彥表

桓溫

臣聞大樸既虧則高尚之標顯道喪時昏則忠貞之義
彰故有洗耳投淵以振玄邈之風亦有秉心矯跡以敦
在三之節是故上代之君莫不崇重斯軌所以篤俗訓

民靜一流競伏惟大晉應符御世運無常通時有屯蹇
神州丘墟三方圯裂兔罝絕響於中林白駒無聞於空
谷斯有識之所悼心大雅之所歎息者也陛下聖德嗣
興方恢天緒臣昔奉役有事西土鯨鯢既懸思宣大化
訪諸故老搜揚潛逸廉武羅於羿浞之墟想王蠋於亡
齊之境竊聞巴西譙秀植操貞固抱德肥遯揚清渭波
于時皇極邁道消之會羣黎蹈顛沛之艱中華有顧瞻
之哀幽谷無遷喬之望玄命屢招奸威相逼身寄虎吻

危同朝露而能抗節玉立誓不降辱杜門絕跡不面偽
庭進免龔勝亡身之禍退無薛方詭對之譏雖園綺之
棲商洛管寧之默遼海方之於秀殆無以過于今西土
以為美談夫旌德禮賢化道之所先崇表殊節聖詰之
上務方今六合未康豺豕當路遺黎偷薄義聲弗聞益
宜振起道義之徒以敦流遯之敝若秀蒙蒲帛之徵足
以鎮靜頽風軌訓囂俗幽遐仰流九服知化矣

譙秀字元彥巴西人周之孫性靜不交於俗李雄盜

蜀徵秀不應躬耕山藪桓溫平蜀後薦之時以秀篤老故不徵遣使勅所在四時存問年九十餘卒

乞卹錄王濬後表

桓溫

臣聞崇德賞功為政之所先興滅繼絕百王之所務故德參時雍則奕世承祀功烈一代則永錫祚胤案故撫軍王濬歷職內外任無文武料敵制勝明勇獨斷義存社稷之利不顧專輒之罪荷戈長驚席卷萬里僭號之吳面縛象魏今皇澤被於九州玄風洽於區外襄陽之

封廢而莫續恩寵之號墜於近嗣遐邇酸懷臣竊悼之
濬今有二孫年出六十室如懸磬餬口江濱四節烝嘗
菜羹不給昔漢高定業求樂毅之嗣世祖旌賢建葛亮
之脩夫效忠異代立功異國尚通天下之善使不泯棄
况濬建元勲於當年著嘉慶於身後靈基託根於南垂
皇祚中興於江左舊物克彰神器重耀豈不由伊人之
功力也哉誠宜加恩少垂矜憫追錄舊勲纂錫茅土則
聖朝之恩宣暢於上忠臣之志不墜於地矣

濬有二孫過江不見齒錄安西將軍桓溫鎮江陵表
言云云卒不見省

謝封康樂公表

謝靈運

昔強氏暴虐恃僭歷紀既噬五都志吞六合遂陷沒西
河傾覆南漢凌藉紀郢跨越淮泗于時策畫惟疑地險
已謝咸懼君臣同泯有生無餘亡祖奉國威靈董符崇
重盡心所事剋黜禍亂功叅盤鼎胙土南服逮至臣身
值遭泰路日月改暉榮落代運輸稅唐化生幸無已不

悟天道下濟鴻鈞曲成乃眷遐績式是興微分虎鈿龜
復顯茅土鳴玉拖紱班景元勲澤洽往德恩覃來胤永
惟先蹤遠感崩結豈臣虺弱所當祇承臣聞至公無私
甄善則一皇恩遠被殊代可侔是以信陵之賢簡在高
祖之心望諸之道復獲隆漢之封觀史歎古欽茲盛美
豈謂榮渥近霑微躬傾宗殞元心識其會酬恩答厚罔
知所由

靈運玄之孫宋初襲封康樂公此表通篇皆不忘晉

是其微意

薦周續之表

劉柳

恢耀和肆必在蕪城之寶翼亮崇本宜紓高世之逸是以渭濱佐周聖德廣運商洛匡漢英業乃昌伏惟陛下道邁振古應天繼期游外暢於冥內體遠形于應近雖汾陽之舉輟駕於時艱明揚之旨潛感于窮谷矣竊見周續之清真貞素思學鉤深弱冠獨往心無近事性之所遣榮華與饑寒俱落情之所慕巖澤與琴書共遠加

以仁心內發義懷外亮留愛崑山誠著桃李若升之宰
府必鼎味斯和濯纓儒官亦王猷遐緝臧文不知失在
降賢言偃得人功由升士願照其丹欸不以人廢言

續之字道祖雁門廣武人其先過江居豫章十二通
五經五緯號曰十經既而入廬山事遠公時與劉遺
民陶淵明號潯陽三隱江州刺史劉柳薦之宋武帝
辟太尉掾不就帝即位召之為開館集生徒乘輿幸
焉晚以病移鍾山卒柳湛之父也

刺史廣州薦從事朱萬嗣表

陸徽

陵雪褒頴貞柯必振尊風賞流清原斯挹是以衣囊揮
譽於西京折轅延高於東帝伏見朱萬嗣理業冲夷秉
操純白行稱私庭能著官政雖氏非世祿宦無通資而
隨牒南服位極僚首九綜州綱三端府職頻掌蕃機屢
績符守年暨知命廉尚愈高氷心與貪流爭激霜情與
晚節彌茂厯宰金山家無寶鏤之飾連組珠海室靡瑤
珥之珍确然守志不求聞達實足以澄革汙吏洗鏡貪

氓臣謬忝司牧任專萬里雖情祇慎擢才闕豪露敢罄
愚陋舉其所知如得提名禮闈抗迹朝省搏嶺表之清
風負水宇之潔望則恩融一臣而施光萬物敢緣天澤
雲行時德雨施每甄外州榮加遠國是以獻其瞽言希
垂聽覽

徽字休猷吳郡吳人宋文帝元嘉十五年除廣州刺
史加督清名亞王鎮之二十三年為益州刺史亦加
督卹隱有方威惠蕪著蜀土安之卒于官家無餘財

文帝痛惜之諡曰簡

讓婚表

虞通之

伏承詔旨當以臨海公主降嬪榮出望表恩加典外顧
審輜蔽伏用憂惶臣寒門悴族人凡質陋閭閻有對本
隔天姻如臣素流家貧業寡年近將冠皆已有室荆釵
布裙足得成禮每不自解無偶迄茲媒訪莫尋素族弗
問自惟門慶屢降公主天恩所覃庸及醜末懷憂抱惕
慮不獲免徵命所當果膺茲舉雖門忝宗榮於臣非倖

仰緣聖貸冒陳愚實自晉氏以來配尚王姬者雖累經
美胄亟有名才至如王敦懾氣桓溫斂威真長佯愚以
求免于敬炙足以違禍王偃無仲都之質而裸雪於北
階何瑀闕龍工之姿而投軀於深井謝莊殆自害於矇
叟殷冲幾不免於強鉏彼數人者非無才意而勢屈於
崇貴事隔于聞覽吞悲茹氣無所逃訴制勒甚於僕隸
防閑過於婢妾行求出入人理之常當待賓客朋從之
義而今掃轍息駕無窺門之期廢筵抽席絕接對之理

非惟交友離異乃亦兄弟疎濶第令受酒肉之賜制以
動靜監子待錢帛之私節其言笑姆妳爭媚相勸以嚴
尼媼競前相諂以急第令必凡庸下才監子皆葭萌愚
豎議舉止則未閑是非聽言語則謬於虛實姆妳敢恃
耆舊唯贊妬忌尼媼自唱多知務檢口舌其間又有應
答問訊卜筮師母乃至殘餘飲食詰辨與誰衣被故弊
必責頭領又出入之宜繁省難衷或進不獲前或入不
聽出不入則嫌於欲踈求出則疑有別意召必以三晡

為期遣必以日出為限夕不見晚魄朝不識曙星至於
夜步月而弄琴晝拱袂而披卷一生之內與此長年又
聲影裁聞則少婢奔迸裾袂向席則醜老叢來左右整
刷以疑寵見嫌賓客未冠以少容致斥禮有別媵象有
貫魚本無嫚嫡之嫌豈有輕婦之誚今義絕傍私虔恭
正匹而每事必言無儀適設辭輒云輕易我又竊聞諸
主聚集唯論夫族緩不足為急者法急則可為緩者師
更相扇誘本其恒意不可貸借固實嘗辭或云野敗去

或云人笑我雖曰家事有甚王憲發口所言恒同科律
王藻雖復彊狠頗經學陟戲笑之事遂為冤魂褚曖憂
憤用致天絕傷理害義難以具聞夫螽斯之德實致克
昌專妬之言有妨繁衍是以尚主之門往往絕嗣駙馬
之身通離釁咎以臣凡弱何以克堪必將毀族淪門豈
伊身責前後嬰此其人雖衆然皆患彰遐邇事隔天朝
故吞言咽理無敢論訴臣幸屬聖明矜照由道弘物以
典處親以公臣之鄙懷可得自盡如臣門分世荷殊榮

足守前基便預提拂清官顯位或由才升一叨婚戚咸
成恩假是以仰冒非宜披露丹實非唯止陳一已規全
身願實乃廣申諸門受惠之切伏願天慈照察特賜蠲
停使燕雀微羣得保叢蔚蠢物憐生自己彌篤若恩詔
難降披請不申便當刊膚削髮投山竄海

南史云宋明帝疾前代公主之妬適江數當尚孝武
女乃使人為數作表讓婚帝以此表示諸主以諷切
之今按藝文類聚作虞通之○此篇頗為一種俗調

作俑姑存以備一體至于役僧一書滿紙齋飯酸飴
氣大非雅士所賞也

謝除宮僚表

孔稚圭

皇太子霞褰青殿日晃春宮駕紫谷之英振洛笙之響
自非氣上白雲韻同明月何以延芳芝苑插羽瓊條竇
嬰戚貴于西京陸曄風嘉于東國伊人之美方曰可舉
孔稚圭南史作孔珪字德璋會稽山陰人好文詠飲
酒與外兄張融情趣相得又與王思遠何點點弟肩

並款交不樂世務門庭之內草萊不翦中有蛙鳴或問之答曰以此當兩部鼓吹永元元年為太子詹事

代蕭侍中敦勸表

江淹

臣公言即日侍中臣惠基給事黃門侍郎臣王僧珍至朱蓋乘雲玄軒肅霧隆高天之旨集微臣之軀神爽矍然斂影無地臣缺長血心未啓素槩辭從意空言隨事盡不能降陛下一時之恩借俄頃之焰遂枉近侍貂簪軾庭臣自亮無庸何以集此退咎慊誠悲枉垂光進戒

朝訓虧茲盛序感慮躑躅榮結夢寐臣檢古少例巡今
逾疑豈有妄叨天功虛竊上賞近謬國華坐取隆貴人
見其過外惜皇猷內畏私青昔西京鼎秩漢世權家丹
墀網戶擊鍾連騎何嘗不以驕滿貽戾謙冲要福者哉
臣不能遵煙洲而謝岐伯迎雲山而揖許由激昂榮華
之間沈潛印組之內光飾既超寵臨亦遠江左以來罕
見其倫今位冠朝端通侯萬戶結象弭於前衡奏金管
於後陣都野宗其榮盛視聽敬其炎貴臣一旦居之誰

以為不忝者乎而陛下猶崇以異禮者是增臣之戾也
况復肅延華勸實深窘迫伏願俯矜單志賜遂前情則
世寢橫議臣蒙緩責

淹字文通初在建平王府被黜為吳興令齊高帝輔
政聞其才召之時沈攸之作亂淹為言公有五勝彼
有五敗帝悅補記室叅軍高帝諸章表皆淹製也齊
明輔政淹為御史中丞遷秘書監兼衛尉梁武至新
林微服來奔天監元年為散騎常侍左衛將軍臨沮

縣伯謂子弟曰吾功名既立欲歸身草萊耳以疾遷
金紫光祿大夫醴陵侯卒諡曰憲

為柳世隆讓封公表

沈約

臣聞懸旌玉塞貳師尚黜其功伐鼓炎州伏波猶懼其
賞徒以蕪委之施或難固辭抽心之情必無雙奪是故
俛容青閣願還慈於裂壤竊步丹墀希收寵於開賦昔
竄命窮雉難迫勢孤沈板未難負戶非切及顧溫清之
館懼結尊慈之懷累葉喁喁舉門惴惴臣事逼君親理

非外獎實賴朝謨謹肅宰略遐震奔鯨外剿臣何力焉
幸得扶老攜幼重出幽堵還軸歸驂再踐鄉路豈可資
國眚以邀其功因家勸而饗其報遂使甘霜受電之心
有同於飾請皎日大河之志匪殊於貌謁

世隆元景之弟子以破沈攸之功封貞陽縣侯齊高
帝踐祚進爵為公

約字休文吳興武康人初武帝在西邸與約遊舊建
康平引為驃騎司馬禪代之事約首發之帝即位約

久處端揆有志台司而帝終不用嘗夢齊和帝斷其
舌乃呼道士奏赤章于天稱事不由己帝聞數譴責
之約懼而卒有司請諡文帝曰懷情不盡曰隱故改
為隱嘗譔四聲譜自謂入神之作帝雅不好而詩家
至今遵用之

為齊明帝讓宣城郡公第一表

仕昉

臣鸞言被臺召以臣為侍中中書監驃騎大將軍開府
儀同三司揚州刺史錄尚書事封宣城郡開國公食邑

三千戶加兵五千人臣本庸才智力淺短太祖高皇帝
篤猶子之愛降家人之慈世祖武皇帝情等布衣寄深
同氣武皇大漸實奉話言雖自見之明庸近所蔽愚夫
一至偏識量已實不忍自固于綴衣之辰拒違于玉几
之側遂荷顧託導揚末命雖嗣君棄常獲罪宣德王室
不造職臣之由何者親則東牟任惟博陸徒懷子孟社
稷之對何救昌邑爭臣之譏四海之議于何逃責且陵
土未乾訓誓在耳家國之事一至于斯非臣之尤誰任

其咎將何以肅拜高寢虔奉武園悼心失圖泣血待旦
寧容復徼榮于家恥宴安于國危驃騎上將之元勲神
州儀刑之列岳尚書古稱司會中書實管王言且虛飾
寵章委成禦侮臣知不愜物誰謂宜但命輕鴻毛責重
山岳存沒同歸毀譽一貫辭一官不減身累增一職已
黷朝經便當自同體國不為飾讓至于功均一匡賞同
千室光宅近甸奄有全邦隕越為期不敢聞命亦願曲
留降鑒即垂順許鉅平之懇誠彌固永昌之丹慙獲申

乃知君臣之道綽有餘裕苟曰易昭敢守難奪故可庶心弘議酌已親物者矣不勝荷懼屏營之至

延興元年七月鸞奉新安王昭即位遂有此授十月丁酉進爵為王辛亥廢帝為海陵王宣城王即位初昉具此草帝惡其詞斥甚愠終建武中昉位不過列校王伯厚有言作文忌切題切題則有嫌○昉字彥昇樂安博昌人尤長為筆才思無窮當時王公表奏無不請焉起草即成不加點竄昉為人至孝祿奉所

收四方餉遺皆頒之親戚即日便盡守新安卒于官
無以為斂遺言不許以新安一物還都

為范尚書讓吏部侯封第一表

任昉

臣雲言被尚書召以臣為散騎常侍吏部尚書封霄城
縣開國侯食邑千戶奉命震驚心顏無措臣雲頓首頓
首死罪死罪臣素門凡流翰嗣無取進謝中庸退慙狂
狷固嘗鑽厲求學而一經不治篆刻為文而三冬靡就
負書燕魏空殫菽粟躡屩齊楚徒知貧賤既而分虎出

守以囊被見嗤持斧作牧以薏苡興謗赭衣為厲見獄
吏之尊除名為民知井臼之逸百年上壽既曰徒然如
其誠說亦已過半亂離斯瘼欲以安歸閉門荒郊再離
寒暑兼以東臯數畝控帶朝夕關外一區悵望鍾阜雖
室無趙女而門多好事祿微賜金而歡同娛老折芟燔
枯此焉自足陛下應期萬世接統千祀三千景附八百
不謀臣釁等離心功慙同德泥首在顏輿棺未毀締構
草昧敢叨天功獄訟謳歌示同民志而隆器大名一朝

總集顧已及躬何以臻此政當以接開白水列宅舊豐
忘捨講之尤存諸公之費俯拾青紫豈待明經臣雲頓
首頓首死罪死罪夫銓衡之重關諸隆替遠惟則哲在
帝猶難漢魏以降達識繼軌雅俗所歸唯稱許郭拔十
得五尚曰比肩其餘得失未聞偶察童幼天機暫發顧
無足算在魏則毛玠公方居晉則山濤識量以臣況之
一何遼落齊季陵遲官方淆亂鴻都不綱西園成市金
章有盈筭之談華貂深不足之歎草創惟始義存改作

恭己南面責成斯在豈宜妄加寵私以乏王事附蟬之
飾空成寵章求之公私授受交失近世侯者功緒參差
或足食關中或成軍河內或制勝帷幄或門人加親或
與時抑揚或隱若敵國或策定禁中或功成野戰或盛
德如卓茂或師道如桓榮或四姓侍祠已無足紀五侯
外戚且非舊章而臣之所附唯在恩澤既義異疇庸實
榮乖儒者雖小人貪幸豈獨無心臣本自諸生家承素
業門無富貴易農而仕乃祖玄平道風秀世爰在中興

儀刑多士位裁元凱任止牧伯高祖少連夙秉高尚所
富者義所乏者時薄宦東朝謝病下邑先志不忘愚臣
是庶且去歲冬初國學之老博士耳今茲首夏將亞冢
司雖千秋之一月九遷荀爽之十旬遠至方之微臣未
為速達臣雖無識唯利是視至于虧名損實為國為身
知其不可不敢妄冒陛下不棄管蒯愛同絲麻儻平生
之言猶在聽覽宿心素志無復貳辭矜臣所乞特迴寵
命則彝章載穆微物知免臣今在假不容詣省不任荷

懼之至

雲字彥龍南鄉舞陰人初與梁武帝俱在竟陵王子良西邸情好歡甚帝時已有徵應雲盡心推事帝兵至都張稷遣雲銜命至石頭遂叅謀議既即位因有此除雲嘗為廣州刺史為豪族譚儼所訴徵下獄赦免所謂赭衣為伍者也

為范始興作求立太宰碑表

任昉

臣雲言原夫存樹風猷沒著徽烈既絕故老之口必資

不刊之書而藏諸名山則陵谷遷貿府之延閣則青編
落簡然則配天之迹存乎泗水之上素王之道紀于沂
川之側由是崇師之義擬迹于西河尊主之情致之于
堯禹故精廬妄啓必窮鑑勒之盛君長一城亦盡刊刻
之美況乎甄陶周召孕育伊顏故太宰竟陵文宣王臣
某與存與亡則義形社稷嚴天配命則周公其人體國
端朝出藩入守進思必告之道退無苟利之專五教以
倫百揆時序若夫一言一行盛德之風琴書藝業述作

之茂道非蕪濟事止樂善亦無得而稱焉人之云亡忽
移歲序鵠鴉東徙松檟成行六府臣僚三藩士女人蓄
油素家懷鈎筆瞻彼景山徒然望慕昔晉氏初禁立碑
魏舒之亡亦從班列而阮畧既泯故首冒嚴科為之者
竟免刑戮置之者反蒙嘉歎至于道被如仁功叅微管
本宜在常均之外故太宰淵丞相疑親賢並軌即為成
規乞依二公前例賜許刊立寧容使長想九原樵蘇罔
識其禁駐驛長陵輜軒不知所適臣間里孤賤才無可

甄值齊網之弘弛賓客之禁策名委質忽焉二紀慮先
犬馬厚恩不答而敝帷毀蓋未辱螻蟻珠襦玉匣遽飾
幽泉陛下弘獎名教不隔微物使臣得駿奔南浦長號
北陵既曲逢前施實仰覲後澤儻驗杜預山頂之言庶
存馬駿必拜之感臨表悲懼言不自宣

建武中雲上此表事竟不行

為蕭揚州作薦士表

任昉

臣聞求賢暫勞垂拱永逸方之疏壤取類導川伏惟陛

下道德旒纁信克符璽六飛同塵五讓高世白駒空谷
振鷺在庭猶懼隱鱗卜祝箴器屠保物色關下委裘河
上非取製于一狐諒求味于蕪米而五聲倦響九工是
詢寢議廟堂借聽輿阜臣位任隆重義蕪家邦實欲使
名實不違微倖路絕勢門上品猶當格以清談英俊下
僚不可限以位貌竊見祕書丞王暕七葉重光海內冠
冕神清氣茂允迪中和叔寶理遣之談彥輔名教之樂
故以暉映先達領袖後進居無塵雜家有賜書辭賦清

新屬言玄遠室邇人曠物疎道親養素丘園台階虛位
庠序公朝萬夫傾望豈徒荀令可想李公不亡而已哉
前侯官令王僧孺理尚棲約思致恬敏既筆耕為養亦
傭書成學至乃集螢映雪編蒲緝柳先言往行人物雅
俗甘泉遺儀南宮故事畫地成圖抵掌可述豈直鼯鼠
有必對之辯竹書無落簡之謬疎坐鎮雅俗弘益已多
僧孺訪對不休質疑斯在並東序之祕寶瑚璉之茂器
誠言以人廢而才實世資臨表悚戰猶懼未允

齊明帝詔求異士始安王暹光有此奏陳儉之子僧孺肅之八世孫祖父皆大僚蓋六朝論人大抵重門望也其後僧孺為郡叅選持廉秉公獨以一青被廢陳不能留心寒素頗不稱薦詞云

為皇太子求一日一朝表

任昉

臣聞內豎告安姬昌怡色鳴雞戒旦周發冠履或以涼燠之後晨昏異宜膳羞之和鼎鼐殊節一辰三朝稱情猶簡終日承顏在理斯愜且長壽之對撫循無已馳道

未窮顧懷不輟豈直下動天性固亦上結慈衷自頃半
旬乃朝遂為通制事踰信次義乖晨省一日萬幾不敢
三塵御省每旦改宿特乞一至寢門

解官表

陶弘景

臣聞堯風冲天潁陽振飲河之談漢德括地商陰峻餐
芝之氣臣棲遲早日簪帶久年仕豈留榮學非待祿恒
思懸纓象闕孤耕壟下席月澗門橫琴雲際始奉中恩
得遂丘壑今便減影桂庭神交松友一出東關故鄉就

望睠言興念臨波瀉淚臣舟棹已遙無緣躬詣不任攀戀之誠謹奉表以聞

弘景字通明丹陵秣陵人父為妾所害弘景終身不娶齊高帝引為諸王侍讀家貧求宰縣不遂永明十年脫朝服掛神武門上表辭祿詔許之止于句曲山號華陽隱居謂門人曰吾見朱門廣廈雖識其華樂而無欲往之心望高巖瞰大澤知此難立止自恒欲就之且永明中求祿得輒差舛若不爾豈得為今日

之事豈惟身有仙相亦緣勢使之梁武手勅招之畫
兩牛一放水草之間一着金籠頭有人執繩以杖驅
之年八十五卒

淵明之去官畏見督郵也逸少之去官恥為王述下
也貞白之去官求宰縣不得也然皆無礙其為高也
後人于此必盡諱之而別尋一好題目人臣着尋題
目三字于胷中則上不顧君父下不顧朋友昧心蒙
面之事無不為矣此仕宦之最惡套也

謝徵補謝朓何胤表

梁武帝

夫窮則獨善達以兼濟雖出處之道其揆不同用捨惟
時賢哲是蹈前新除侍中太子少傅朓前新除散騎常
侍太子詹事都亭侯胤羽儀世胄徽猷冠冕道業德聲
康濟雅俗昔居朝列素無宦情賓客簡通公卿罕預簪
紱未褫而風塵擺落且文宗儒肆互居其長清規雅裁
兼擅其美並達照深識預睹亂萌見庸質之如初知貽
厥之無寄拂衣東山眇絕塵軌雖解組昌運實避昏時

家膺鼎食而甘茲橡艾世襲青紫而安此懸鶉自澆風
肇扇用南成俗淳流素軌餘烈頗存誰其激貪功歸有
道康俗振民朝野一致雖在江海而勲同魏闕今泰運
甫開賤貧為恥況乎久蘊瑚璉暫厭承明而可得求志
海隅永追松子臣負荷殊重叅贊萬幾實賴羣才共成
棟榦思挹清源取鏡止水愚欲屈居僚首朝夕諮諏庶
足以翼宣寡薄式是王度

永元中肫脰並徵不就東昏皆命迫遣高祖平京邑

霸府初開表請補軍諮祭酒並不至

上昭明太子集別傳等表

梁簡文帝

若夫正少陽之位主承祧之則口實為美唯稱啓誦自
茲厥後罕或聞焉昭明太子稟仁聖之姿縱生知之量
孝敬兼極溫恭在躬明月西流幼有文章之敏羽籥東
序長備元良之德非假二疏寧勞四皓虎賁惡其經學
智囊慙其調護豈止博望延賓壽春能賦問疑棗據書
戒憑陵而已哉玉折何追星頽靡續地尊號嗣外陽之

術無徵位比周儲綏山之駕不反臣以不肖妄作明離
出入銅龍瞻仰故實思所以揄揚盛軌宣記德音謹撰
昭明太子別傳文集請備之延閣藏諸廣內永彰茂實
式表洪徽

昭明太子名統字德施以武帝平建鄴之年生讀書
數行並下過目皆憶賦詩屬思便成無所點易時俗
稍奢太子欲以已率下身衣浣衣食不兼肉自加元
服帝使省萬幾明于庶事天下稱仁卒時年三十三

按梁武諸子昭明最賢其後人自瑀至邁八葉宰相
名德相望與唐相終始天之報施可謂不爽矣

薦鮑幾表

梁元帝

臣聞思皇多士仄陋所以明敷疇咨熙載髦俊所以並
作斯固殷殿初基拾龍淵之寶虞祠始構獻鳳管之玉
旌蒲出魯賁帛歸齊頌聲既興盛業斯在伏惟陛下則
天緯地乘正馭才沙汰八風澄明六合叶龜登夢之客
日賁於丘園韋轂投釣之臣相望於魏闕故以物無遺

寶矣振鷺有充庭之謳白駒罕空谷之詠洋洋濟濟無
得而稱者焉臣誠愧知才識職非選舉竊以進賢上賞
蔽賢顯戮敢緣斯義用舉所知伏見鮑幾門庭雍睦立
身貞退博涉文史頗閑刀筆忠公抗直出宰廉平雅志
弘深安貧專靜解巾入仕三十餘年自遊臣府一紀于
茲前宰東邑實有二魯之風近處南臺欲尊兩鮑之則
伏揆天嚴已當簡在脫蒙顯居良局登以清貫將齊毛
玠古人之服實同吳隱酌水之廉昔丁隈牧州陳顧程

之好禮徐靖為郡薦袁渙之篤學桓範驅傳先舉管寧
朱則剖符亦稱董直臣才非往哲識愧前修輕塵聽覽
伏待斧鉞

唐執文志有鮑幾集八卷○蕭氏父子之文可謂盛
矣然其立國抑何不振之甚也當時裴子野作雕蟲
論淵乎有深識焉惜其觸時忌而不盡言也余未及
錄姑存其名于此

為韋雍州致仕表

王僧孺

一旦攀附遂無涯限排雲矯漢飛捧待翼陸離蟬組照
灼旛旗受脤推轂執珪奉酎變狹室於高門改小冠於
侯服况復還周紐其六印歸齊列其五鼎常懼輪輕載
積基薄墉高器覆危傾人指鬼瞰老與年并疾隨衰及
途遙齒截漏迫鐘鳴高春之景一斜不周之風忽至菌
蟪夕陰倏駛無幾僅薜朝采飄零已及仰朱闕而掩涕
俯濠谷而自悲豈復式瞻拱默仰接鐘鼓儻帷蓋未親
東岳稍駐擊壤鼓腹其賜猶多

韋叡字懷文京兆杜陵人梁武起兵叡有佐命功及即位封都梁子屢以功進為侯天監十四年為雍州刺史十五年表致仕優詔不許普通元年卒諡曰嚴叡素羸每戰未嘗乘馬以板輿自載所向克捷北人號為韋虎武帝銳意釋氏天下從風而化叡自以位居大臣不欲與衆俯仰所行略如他日

賀平鄴都表

庾信

臣聞泰山梁甫以來即有七十二代龍圖龜書之後又

已三十餘年雖復制法樹同禮殊樂異至於文離武落
剡木弦弧席捲天下之心包含八荒之志其揆一矣伏
惟陛下握天樞秉地軸駕馭風雲驅馳龍虎沈雄內斷
不勞謀於力牧天策勇決無待問於容成是以威風所
振烈火之遇鴻毛旗鼓所臨衝風之卷秋葉竊聞伊洛
戎夷幽并僭偽抱圖載籍已歸丞相之府銜玉繫綬並
詣中軍之營百年逋誅遂窮巢窟三代敵怨俄然掃蕩
昔周王鮪水之師尚勞再駕軒轅上谷之戰猶須九伐

未有一朝指麾獨決神慮平定寓內光宅天下二十八宿止餘吳越一星千二百國裁漏麟洲小水若夫咸康之年四方始定建武之代諸侯並朝不得同年而語矣雖復八風並唱未足頌其英聲六樂俱陳無以歌其神武坐釣臺而誓衆妣啟繼夏禹之功入南郊而問罪姬發成周文之志此無改之道大孝也歟當今鹿臺已散離宮已遣兵藏武庫馬入華山立明堂之制奏大武之樂盛矣哉上天降休未有也政須東南一尉立於比

景之南西北一候置於交河之北然後命東后詔蒼冥
衢壇琬碑銀繩瓊檢告厥成功差無慚德臣忝竊榮幸
莅政東藩不獲躬到闕庭預觀大慶不勝鳬藻踴躍之
至

周武帝建德六年帝至鄴遂平齊禽齊主及其太子
于青州齊諸行臺州鎮悉降凡得州五十五郡一百
六十二縣三百八十五

庾信字子山父肩吾為梁太子中庶子東海徐摛為

右衛率縞子陵及信並為抄撰學士出入禁闥恩禮
莫比文並綺艷世號徐庾體元帝中聘于西魏屬大
軍南討遂留長安累遷驃騎大將軍開府儀同三司
進爵義城縣侯明帝武帝並好文學特蒙恩禮滕趙
諸王周旋款至有若布衣信雖位通顯常作鄉關之
思乃為哀江南賦以致意

賀新樂表

周武帝 庾信

臣聞天地順動則雷出為豫聖人成功則風行有節故

六德在咸池之宮山谷可調八風入承雲之奏人神不
雜我太祖文皇帝體國經野設官分職變魏作周移風
正雅衣裳而朝萬國珪璧而會諸侯至如經綸圖籍校
讐煙燼樂正無缺章秩宗無廢典豈但商頌十篇得諸
太師之室虞書五禮取於恭王之宮伏惟皇帝以下武
嗣興中陽繼業運日月之明動淵泉之慮律厯著微無
煩於太史陰陽晷度躬定於天官故得參考八音研精
六代封晉魏為二王序殷周為三恪雖復朱干玉戚尚

識典刑素韞纁裳猶因雄據未若山雲特起八卦成形
鳳凰于飛九州觀德改金奏於八列合天元於六舞聲
含擊石更入登歌調起初鐘還叅玉管足以感天地而
通神明康帝德而光玄象昔者齋居玄扈為曲在於雲
門師度盟津習舞歸於山立遂乃包括三名克諧一代
作者之謂聖天之所啓乎豈惟路鼓靈鼗空桑孤竹廣
矣大矣輪焉奐焉是知零陵孝廉空傳玉管始平太守
虛稱銅尺臣等並預鈞天同觀張樂軒墀弘敞欄檻眺

聽崇牙業業猛簏趨趨翠鳳揚旌靈囂樹鼓杳冥雲
霧蕩薄丘陵醴泉與甘露同飛赤雁與斑麟俱下聘魯
請觀理當見其盛德適齊忘味定是知其盡美昔淵魚
聽曲尚得聳鱗樞馬聞絃猶能仰秣臣等誠愧知音敢
忘悅豫若使詳其音律是所邈然但能記其鏗鏘於茲
為幸不勝慶悅之誠謹詣朝堂奉表以聞

齊王進白兔表

庾信

臣聞輿圖欲遠則玉虎晨鳴轍迹方開則銀虬入貢伏

惟陛下明明在上翼翼居尊德動天關威移地軸是以
風煙照燭毛羽禎祥史不絕書府無虛日臣受服元戎
用綏邊鄙轅門所屆始次熊山前茅慮無乃獲白兔光
鮮越雉色麗秦狐月德符徵金精表瑞呈祥與頌效異
披圖尊敬之迹既明應事之機斯兆臣之龔行實從陝
略瑞以素質彌雄西氣庶重承廟算方事申威揜代偃
齊分韓裂趙不任鳬藻踊躍之情

齊王憲周文帝子也通敏有度量為帝所器蜀平欲

授之以幼未果明帝始遣之時年十八有善政蜀人立碑頌德後進齊王屢典征伐齊人憚其勇略宣帝即位忌而殺之諡曰煬時人知其冤酷

齊王進蒼烏表

庾信

臣聞飛南陽之雉尚闡霸圖下建章之鵠猶調和氣況乃虞廷告瑞姬社呈祥咸高識哺之心實貴能知之性伏惟皇帝陛下德教百姓孝行四海攝提從紀天下文明是以東海輸禽乍改黔質西山度羽或變蒼精臣去

月三十日行到陝州堂內見一蒼烏林薄回翔循環不
去駐乘木之精轉司風之翼即召儀同某等同時觀見
斯實禮敬所覃孝慈之感理宜歸瑞秘圖書祥帝冊用
光至德取効升平無令赤鳳留止偏為瘞玉之歌玄鶴
徘徊獨擅銜珠之舞

齊王進赤雀表

庾信

臣聞南陽雉飛尚論秦霸建章鵠下猶明漢德當今天
不愛寶地必呈祥自應長樂觀符文昌啟瑞伏惟皇帝

欽明文思惟以劬勞成務厯象日月允釐百工海水無
波天星不動去四月十三日秦州清水郡伯陽縣文谷
林在家獲一赤雀光同朱鳳色類丹烏降火飛精似入
公車之府流金成製若上凌雲之臺謹按赤雀銜書止
於鄴戶周之受命興乎此祥即事所觀同符合契實可
圖形瑞譜書頌儒林事足成臺名堪紀號豈直雲中太
守見赤心之奉主蓬萊童子知白環之報恩臣等預觀
休徵情迫恒慶不任鳬藻之至

為閩大將軍乞致仕表

庾信

臣聞禮云大夫七十致仕於朝傳家於子膳則貳珍衣
稱時制臣自出身奉國四十餘年遭遇風雲從微至著
太祖文皇帝扶危濟難奄有關河臣實無堪中涓從事
自洛食風塵河梁旗鼓華陰有白馬之兵河曲有黃沙
之陣臣雖用命不能奇策功薄賞厚因人成事恩澤年
表常以愧心仰逢周朝以揖讓登庸謳歌受命主貴臣
遷頻煩榮寵三槐以鑄鼎象物知其神姦五等以桓珪

飾瑞守其宮室臣以何德兼而有之况復水土之職王
梁以應讖受徵兵戈之王韓信以登壇獨拜語其連類
臣又何人當今四海未寧三方鼎峙陛下勞心之日羣
公展効之秋而臣甲子既多耄年又及無叅賓客之事
謬達諸侯之班尸祿素餐久忝彝典負乘致寇徒煩有
司加以寒暑乖違節宣失序風水交侵菁華已竭雖復
庶頗強飯馬援據鞍求欲報恩何能為役榮啟期之樂
適足自貽燭之武之言無能為也特乞解所居官言從

初服事符骸骨之請非謀几杖之賜若臣北陵移病東
臯歸老山河茅社一反司勲公侯珪璧還封典瑞則朝
無冒位之人臣免妨賢之責虞氏養老敢希東序之榮
周朝如荼豈望西郊之禮但瞻仰天威方違咫尺徘徊
城闕私增悽戀不任知止之情云云

閻慶河陰人世為將家累官大將軍進爵太安郡公
晉公護母慶之姑也護擅朝而慶未嘗阿附及護誅
武帝以此重之建德二年致仕周宣帝隋文帝皆令

皇子問疾極一時尊榮之典焉

為晉陽公進玉律秤尺斗升表

庾信

臣聞三才既立君臣之道已陳六位時成禮樂之功斯正故以叶和日月測度陰陽悅豫兆人儀刑萬國者也伏惟皇帝應籙馭天披圖受命據太陽而懸象履文昌而建極白環表讓德之符玄圭告成功之瑞太階既平升中可習必當水建千年山稱萬歲伏見勅旨刊正音律平章歷象奏黃鐘而歌大呂變孤竹而舞雲門莫不

遠取疎通聲從安樂四分既明三微且定是以聞鐘於
洛浦即辨聲聿聽鐸於邯鄲先知響韻二分二至行於
司厯之官九變九成被於中和之職足以動天地感鬼
神被風俗平寒暑豈直吟嘯谿谷回翔鸞鳳而已哉是
知零陵廟前徒尋舜管始平城下空論周尺臣聞上製
其禮下習其儀君定其法臣行其事謹遣玉律一具并
玉秤尺斗升合等始得成功至於分粟累黍量絲數籥
實以仰稟聖規叅詳神思所冀節移陰管無勞河內之

灰氣動陽鐘不待金門之竹而琬琰事輕般倖慮淺不足展乎成均增輝度量賁器奉表以聞

勸進元帝表

徐陵

封唐有聖還承帝嚳之家居代維賢終纂高皇之祚無為稱於華鳥至治表於垂衣而撥亂反正非聞前古至如金行重作源出東筦炎運猶昌枝分南頓豈得掩顯姓於軒轅非才子於顓頊莫不因時多難俱繼神宗者也伏惟陛下出震等於勛華鳴謙同於旦奭握褒秉鉞

將在御天玉璽珠衡先彰元后神祇所合非惟太室之
祥圖牒斯歸何止堯門之瑞若夫大孝聖人之心中庸
君子之德固以作訓生民貽風多士一日二日研覽萬
幾允文允武包羅羣藝擬茲三大賓是四門厯試諸難
咸熙庶績斯無間而稱也自無妄為象鍾禍上京泉猊
虔劉宗社蕩墜嶙頭鐵額興暴皇年封狶脩蛇行災中
國靈心所宅下武其興望紫極而行號瞻丹陵而殞慟
家冤將報天賜黃鳥之旗國害宜誅神奉玄狐之錄尅

李軼於河津征陶謙於海岱滕公擁樹雄氣方嚴張繡
交兵風神彌勇忠誠貫於日月孝義感於冰霜如雷如
霆非貌非虎前驅效命元惡斯殲既挂膽於西州方燃
膺於東市蚩尤三塚寧謂嚴誅王莽千剗非云明罰青
羌赤狄同界狼豺胡服夷言咸為京觀邦畿濟濟還見
隆平宗祀惜惜方承多福自氤氲渾沌之世驪連栗陸
之君卦起龍圖文因鳥跡雲師火帝非無戰陣之風堯
誓湯征咸用干戈之道星躔東井時破嶠潼雷震南陽

初平尋邑未有援三靈之已墜救四海之羣飛赫赫明
明龔行天罰如當今之盛者也於是卿雲似盖晨映姚
鄉甘露如珠朝垂原寢芝房感德咸出銅池萸萸伺辰
無勞銀箭重以東漸玄菟西踰白狼高柳生風扶桑銜
日莫不編名屬國歸貢鴻臚荒服來賓遐邇同慶其文
昭武穆跗萼也如彼天平地成功業也如此久應旁求
掌故詢詔天官斟酌繁昌經營高邑宗王啓霸非勞武
德之侯清蹕無虞何事長安之邸揚龍旂以饗帝御鳳

宸以承天厯數在躬疇咨為讓某官等至鄴伏承聖旨
謙冲為而不宰或云洛陽未復函谷無泥旋駕金陵方
膺天睠愚謂大庭少昊非有定居漢祖殷宗皆無恒宅
登封岱嶽且署明堂巡狩荊州時行司隸何必西瞻虎
踞乃建王宮南望牛頭方稱天闕抑又聞之玄珪既錫
蒼玉無陳乃棧樸之愆期非包茅之不貢雲和之瑟久
廢甘泉孤竹之管無聞方澤豈不懼歟伏願陛下因百
姓之心振萬邦之命豈可逡巡固讓方示石戶之農高

謝為君徒弘箕山之客未知上德之不德惟見聖人之
不仁率土翹瞻蒼生何望昔蘇季張儀違鄉負俗尚復
招三方以事趙請六國以尊秦况臣等預奉皇華親承
朝命珪璋特達通聘河陽貂珥雍容尋盟渾水加牢貶
館隨世汙隆瞻望鄉關誠均休戚但輕生不造命與時
乖等一介之行人同三危之遠擯承間內殿事絕耿弇
之因封奏邊城私等劉琨之哭

侯景之亂元帝擁重兵居上流坐視不救且盡除弟

姪之礙手者幸父兄顛沛以為稱帝地史謂不急莽
卓之誅先行兄弟之戮此真千古罪人也當時梁之
臣子舍元帝無可戴故勸進歸焉沈炯表中用吳楚
管蔡大是曲筆孝穆此篇大可味○元帝時戀江陵
不肯詣建業此表大庭以下特為之解

代王僧辯勸進梁元帝表

沈炯

紫宸曠位赤縣無主百靈聳動萬國回皇雖醉醒相扶
同歸景毫式歌且誦總赴唐郊猶懼陛下俛首潛然讓

德不嗣傳車在道方慎宋昌之謀法駕已陳尚杜耿純
之勸岳牧翹首天民累息臣聞星回日薄擊雷鞭電者
之謂天獄立川流吐霧蒸雲者之謂地苞天地之混成
洞陰陽之不測而以裁成萬物者其在聖人乎故云天
地之大德曰生聖人之大寶曰位黃屋廟堂之下本非
獲已而居明鏡四衢之罇蓋由應物取訓伏惟陛下稽
古文思英雄特達比以周旦則文王之子方之放勛則
帝摯之季千年旦暮可不在斯庭闕湮亡鍾鼎淪覆嗣

膺景厯非陛下而誰豈可使赤眉更立盆子隗囂託置
高廟陛下方復從容高讓用執謙光展其矯行偽書誣
罔正朔見機而作斷可識矣匪疑何卜無待著龜日者
公卿失馭禍躔霄極侯景憑陵姦臣互起率戎伐潁無
處不然勸明誅晉側足皆爾刁斗夜鳴烽火相照中朝
人士相顧銜悲涼州義徒東望隕涕慄慄黔首將欲安
歸陛下英畧緯天沈明內斷橫劒泣血枕戈嘗膽農山
圯下之策金匱玉鼎之謀莫不定算宸帷決勝千里擊

靈鼉之鼓而建翠華之旗驅六州之兵而總九伯之伐
四方雖虞一戰以霸斬其鯨鯢既章大戮荷校滅耳莫
匪姦回史不絕書府無虛月自洞庭安波彭蠡底定文
昭武穆芳若椒蘭敵國降城和如親戚九服同謀百道
俱進國恥家怨計期就雪社稷不墜繫在聖明今也何
時而申帝啓之避凶危若此方陳泰伯之辭國有具臣
誰敢奉詔天下者高祖之天下陛下者萬國之歡心萬
國豈可無君高祖豈可廢祀即日五星夜聚八風通吹

雲烟紛郁日月光華百官象物而動軍政不戒而備飛
艦巨艦竟水浮川鐵馬銀鞍陵山跨谷英傑接踵忠勇
相顧湛宗族以酬恩焚妻子以報主莫不覆楯銜威提
斧擊衆風飛電耀志滅凶醜所待陛下昭告后土虔奉
上帝廣發明詔師出以名五行夕返六軍曉進便當盡
司寇之威窮蚩尤之伐執石趙而求壘斬姚秦而取鐘
脩掃瑩陵奉返宗廟陛下豈得不仰存國計俯從民請
漢宣嗣位之後即遣蒲類之軍光武登極臨竟始有長

安之捷由此言之不無前准臣等或世受朝恩或身荷重遇同休等戚自國刑家苟有腹心敢以死奪不任悽悽之誠謹奉表以聞

代王僧辯又奉勸進表

沈炯

衆軍以今月戊子總集建康賊景烏伏獸窮頻擊頻挫姦竭詐盡深溝自固臣等分勒武旅百道同趣突騎短兵犀甲鐵楯結隊千羣持戟百萬止紂七步圍項三重轟然大潰羣凶四滅京師少長俱稱萬歲長安酒食於

此價高九縣雲開六合清朗矧伊黔首誰不載躍伏惟
陛下咀痛茹哀嬰忍憤酷自紫庭絳闕胡塵四起孺垣
好時冀馬雲屯泣血治兵嘗膽誓衆而吳楚一家方與
七國俱反管蔡流言又以三監作亂西涼義衆阻強秦
而不通并州遺民跨飛狐而見泯豺狼當路非止一人
鯨鯢不梟倏焉五載英武克振怨恥並雪永尋霜露如
何可言臣等輒依故實奉脩社廟使者持節分告瑩陵
嗣后升遐龍輜未殯承華掩曜梓宮莫測並即隨由備

辦禮具玄荒四海同哀六軍袒哭聖情孝友理當感慟
日者百司岳牧祈仰宸鑒以錫珪之功既歸有道當璧
之禮允屬聖明而優詔無冲窅然凝邈飛龍可躋而乾
爻在四帝閭已叩而閭闔未開謳歌再馳是用翹首所
以越人固執熏丹穴以求君周民樂推踰岐山而事主
漢王不即位無以貴功臣光武不止戈豈謂紹宗廟黃
帝遊於襄城尚訪治民之道放勛入於姑射猶使罇俎
有歸伊此儻來豈聖人所欲帝王所應不獲已而然伏

讀璽書尋諷制旨顧懷勿外未奉慈衷陛下日角龍顏
之姿表於徇齊之日彤雲素氣之瑞基於應物之初博
覽則大哉無所與名深言則晬乎昭章之觀忠為令德
孝實動天加以英威茂略雄圖武算指麾則丹浦不戰
顧盼則版泉自蕩地維絕而重紐天柱傾而更植鑿河
津於孟門百川復啓補穹儀以五石萬物再生縱陛下
拂袵衣而游廣成登弇山而去東土羣臣安得仰訴兆
庶何所歸仁况郊祀配天罍篚禮曠齊宮清廟匏竹不

陳仰望鑾輿匪朝伊夕瞻言法駕載渴且饑豈可久稽
衆議有曠曩則舊郊既復函維已平高奴櫟陽宮館雖
毀濁河清渭佳氣猶存臯門有伉甘泉四敞土圭測景
仙人承露斯蓋九州之赤縣六合之樞機博士捧圖書
而稍還太常定禮儀而已列豈得不揚清駕而赴名都
具玉鑾而遊正寢昔東周既遷鎬京遂其不復長安一
亂邾洛永以為居夏后以萬國朝諸侯文王以六州匡
天下跡基百里劒杖三尺以殘楚之地抗拒九戎一旅

之師剪滅三叛坦然大定御輦來歸解五牛於冀州秣
六馬於譙郡緬求前古其可得歟對揚天命何所讓德
有理存焉敢重所奏

侯景之亂炯為景將宋子仙所得及子仙敗王僧辯
購之酬所獲錢十萬自是羽檄軍書皆出於炯及簡
文遇害四方岳牧上表勸進僧辯令炯製表當時莫
有逮者

經通天臺奏漢武帝表

沈炯

臣聞橋山雖掩鼎湖之竈可祠有魯遂荒大庭之跡無
泯伏惟陛下降德猗蘭纂靈豐谷漢道既登神仙可望
射之罘於海浦禮日觀而稱功橫中流於汾河指栢梁
而高宴何其甚樂豈不然歟既而運屬上仙道窮晏駕
甲帳珠簾一朝零落茂陵玉盃宛出人間凌雲故基共
原田而膺膺別風餘趾帶陵阜而茫茫羈旅縲臣能不
落淚昔承明既厭嚴助東歸駟馬可乘長卿西反恭聞
故實竊有愚心黍稷非馨敢望徽福但雀臺之弔空愴

魏君雍丘之祠未光夏后瞻仰煙霞伏增悽戀

三輔黃圖曰武帝元封二年作甘泉通天臺去地百餘丈以候天神元鳳間自毀○烱字初明荊州陷為西魏所虜以母老在東恒思歸國恐以文見留有所作輒秘不傳嘗獨行經漢武通天臺為表奏之陳已思歸之意其夜夢有宮禁之所兵衛甚嚴便以情事陳訴聞有人言甚不惜放卿還幾時可至少日果與王克等並獲東歸廩信王褒惜而不遣

戲作鮓表

韋琳

臣鮓言伏見除書以臣為粽

一作糝

熬將軍油蒸校尉臠

州刺史脯腊如故者肅承將命含灰屏息憑籠臨鼎載

兢載惕臣聞高沙老嫗非有意於綺羅白鮓女兒豈留

心於珠翠

一無此四句

臣美愧夏鱸味慚冬鯉常恐鮓服之

誚每懼鼈巖之譏是以漱流湖底枕石泥中不意高賞

殊私曲蒙鈞拔遂得起升綺席忝預玉盤爰廁玳筵猥

煩象箸澤覃紫購恩加黃腹方當鳴鳶動桂紆蘇佩櫳

輕飄纔動則樞梁如雲濃汁暫停則蘭膏成列婉轉綠
蘿之中逍遙朱唇之內銜恩啞澤九殞弗辭不任屏榮
之至謹到銅鎗門奉表以聞

詔答云省表具知卿池沼搢紳陂池俊乂穿蒲入荇
肥滑有聞允堪茲選無勞謝也

後梁韋琳天保中為舍人涉獵有才藻善劇談嘗為
組表以譏刺時人

為陳六宮謝表

江總

鶴籥晨啓雀釵曉映恭承盛典肅荷徽章步動雲袿香
飄霧縠媿纏艷粉無情拂鏡愁縈巧黛息意臨牕妾聞
漢水贈珠人間絕世洛川拾翠仙處無雙或有風流行
雨窈窕初日聲高一笑價起兩環乃可桂殿迎春蘭房
侍寵借班姬之扇未掩驚羞假蔡琰之文寧披悚戴

總字總持陳宣帝時為太子詹事總性溫裕工詩溺
於浮靡及為宮端與太子為長夜之飲養良娣陳氏
為女太子亟微行遊總家宣帝缺怒免之後又厯侍

中左右尚書後主即位歷吏部尚書僕射尚書令不持政務日與後主遊晏後庭多為艷詩與陳暄孔範等當時謂之狎客以至於亡入隋拜上開府開皇十四年卒其為自序云太建之時權移羣小諂嫉作威屢被推黜識者譏其言跡之乖

西河王謝太尉表

溫子昇

臣聞拂羽決起力謝摩天策蹇載馳功微送日將短翮難以陵高駕乘無由致遠雖復建旗出郡未追楚趙之

風捧壺人侍徒踵金張之迹及天祚明德運啓興王六
遂始遷九鼎初定於焉承乏有用當官草靡從風未遑
克讓常恐執轡輕輪操刀傷錦

子昇字鵬舉仕東魏為散騎常侍梁使寫其文傳於
江外武帝稱之曰曹植陸機復生此土恨我詞人數
窮百六傳標使吐谷渾見其國主牀頭書數卷乃子
昇文也齊文襄引為大將軍諮議荀濟之亂文襄疑
其知謀乃餓諸獄死子昇外恬靜而內深險事故之

際好與其間故及於禍

代為百官賀甘露表

盧思道

河榮洛變授社於勛華玄玉素鱗降靈於湯武其間微禽弱草改狀移形夜宿朝雲星光動色皆以照臨下土發揮帝載千祀一致隔代同符伏惟陛下上總天維傍握河紀持欽翼之小心纂昇平之大業萬靈翹首應三古以西巡兩儀貞觀乘六氣而東指卿雲既出還聞百辟之歌河清可俟實得萬人之歡而上玄乃顧神物荐

委飛甘灑潤玉散珠連昔魏明僊掌竟無靈液漢武金
盤空望雲表豈若神漿可挹流味九戶之前天酒自零
凝照三階之下斯實曠代祥符前王罕遇休矣美矣皇
哉唐哉臣等並徼昌運俱沐玄造驟聞秘社亟覩冥貺
振鱗撫翼空馳魚鳥之心瘞玉編金方待云亭之后

思道字子行年十六中山劉松為人作碑銘思道讀
之多所不解感激讀書後復為文示松松亦不甚解
歎曰學之有益豈徒然哉然不持操行由是宦途淪

滯○齊文宣崩文士各作挽詩魏收楊休之得一二
首思道得八首人稱八米盧郎蓋以稻喻之言十稻
之中得八米也

勸封禪表

上官儀

臣某等言臣聞乾元惟大播四序而無言坤儀蓋厚寧
萬象而得一至於號均三大體覆載以曲成聖表千齡
順剛柔以歲用是以可久可大永固皇王之緒貞觀貞
明獨照陶鈞之上故可登封泰嶽類帝以尊天降禪肅

然禋宗以厚地伏惟陛下膺圖紹錄儀天纂鏡受昭華
而光寶位正璣衡而握金符銷伏鼃而綴上玄剪應龍
而清下瀆於是靈臺偃伯暢轂埋輪刑政肅清削秋荼
之繁蕪雅頌先烈激圓海之漪瀾就月幽覃則燭龍開
景薰風遠暢則蟠木增華沒羽浮金之章昭載筆於僊
室韋韞弁袵之首襲長纓於蘭錡九疇式序七德攸宣
發神化於丹青敷禮義之粉澤既而睿德潛通至誠冥
台禎圖載啓神物發揮雙舸呈班馴擾於君囿九芝獻

彩燭耀於帝池太史標祥鏡流千里卿雲表貺凝華五色江茅鄔泰歲時麟萃東鰈西鷄日月波屬鴻符巨慶疇可詳言誠迺岱郊佇遂云垆望蹕臣某等

中謝

永言

遐載緬鏡前徽王迹之所歲蕤帝圖之所凝遠龍官結繩之后鳥紀垂衣之君治定功成俱備升中之禮塵清海晏咸申謁款之誠異世同符千載一揆諒以增高益厚式酬靈睠陛下德光宙始文煥震初蓆蘿而因萬物典衷而濟下元鎔範生靈張四維於地絡締構函夏建

八柱於玄樞宏規絕迹功無與二駕三五而遙集超八
九而騰驤加以璇厯啓微躔南至於朔旦金鼓問罪削
左袵於交河固可恭柴燎之展采穆靈壇之裡敬焉得
徇小節於冲挹忘至公之鴻典絕三神之歡拒萬方之
志雖復翹心天路未留三舍之感延佇帝閭逾邈九霄
之望伏惟陛下紆瑤池之渺轡屈姑射之凝神酌令典
於中樽遵時邁於羸里採公卿之嘉議覽搢紳之謹辭
逸記重甄頽章再紐詔雨師以先路命風伯以清塵六

飛案軌九旗齊列榮光承憶非煙翼衡輯瑞而嘉肆覲
瘞玉而恭儲祉方使日觀增華仙閣改飾神光霄映若
流照於春陵雲色盡開似凝暉於豐谷表咸池於翠岳
萬歲叶其殷薦席藁結於紫壇八神歆其明祀籠千古
之偉觀孕七百之丕業臣等命與時偕濯景昌運優游
渠閭之內怡悵南風之絃棲息蓬山之阿弋釣先皇之
道至於朝猷國紀頗踐輿隅陛下推而不居竊所未喻
鬱云梁之典缺懷庭之儀沮神主之欲漏貪天之議伏

願杲其日出照傾陽之心油然作雲降離畢之澤庶使
飛英騰茂秘玉檢而遐傳手舞足蹈扈翠華於喬嶽

儀字游韶太宗每屬文遣儀視藁高宗時進西臺侍
郎同東西臺三品武后得志遂牽制帝帝不能堪欲
廢之召儀與議使草詔左右告后后自申訴帝曰上
官儀教我許敬宗希后旨構儀與梁王忠謀大逆下
獄死孫女為中宗昭容追贈儀中書令楚國公

皇太子請脩書表

崔融

臣聞昔者明王學以化人成俗古之君子文以緯地經天雖有閭風之高嶽弗登弗知其峻也雖有浴日之巨溟弗涉弗知其廣也伏惟天皇域中居大天下化成百官以理萬人以察日行中道而淑清歲起攝提而位序光薰萬物豈直芝珥棠蔭澤加四海寧惟壽麻孤竹地成形而天成象其道彌光河出圖而洛出書其徵可驗環林壁沼金門石室墳典積於丘山筆墨盈於泉海聖朝多士自可包三代之文臣顧不才何足奉三皇之教

皇慈渥洽帝獎優隆擢公望為太師徵子房為少傅所
冀習與智長化與心成嘗辛苦於歲餘終未階於日就
臣聞學者殖也問以辨之積必有成勤則不匱以周公
之上聖日讀百篇以孔父之多能韋編三絕臣雖不敏
竊所庶幾然以列代遺章先王舊典康成興業纔覽卷
於八千士安覃思願加年於累百豈不以學而時習博
則難精者乎今欲舉其蕭稂撮其樞要可以出忠入孝
可以益國利人極賢聖之大猷盡今昔之能事商權百

氏勒成一家庶有代於箴規長不違於左右又近代書
鈔實繁部帙至如華林園徧略脩文殿御覽壽光書苑
長洲玉鏡及國家以來新撰藝文類聚文思博要等並
包括弘遠卒難詳悉亦望錯綜羣書刪成一部藝官賓
館亦既天皇立之矣端士正人亦既天皇致之矣伏乞
俯從微願特降鴻私許臣撰緝遂臣誠請當官學士如
少仍望通取京官謹當開桂樹之山鑿芙蓉之水引甘
泉之詞賦總望園之賓客下芸閣而長謠臨梓厨而高

會一遊蘭芷佇變蓬麻區區之誠敢希矜允豈使肅城
門內唯傳魏國之名崇政殿中獨紀晉朝之事而已無
任誠懇之至謹遣某官某奉表陳請以聞

融字安成齊州全節人中宗為太子典東朝章疏張
易之兄弟誅坐附會貶名授國子司業與脩武后實
錄封清河縣子融為文華婉當時無輩朝廷大筆多
委之誤武后哀冊最高麗絕筆而死杜審言為融所
獎引為服總麻

為百官賀雨請復膳表

崔融

臣等聞太平之代天地合而流津至德之時陰陽和而
布澤所以三農滋殖百物阜安伏惟天冊金輪聖神皇
帝陛下寶命綢繆玄期肸蠭包混元而建極宅造化而
開階德教布濩仁聲洋溢增高益厚已脩中嶽之儀順
時班令更緝正陽之禮近以少愆甘澍親發至誠懷宋
景之一言採殷湯之六事德音纔降靈心允協捧瑤緘
而風起迎寶字而星流雲不崇朝覆三千之藥草雨必

以夜通百億之江河遍高下而同霑在公私而並及陳
留雨穀譬此非多櫟陽雨金方斯未重邦國延有年之
慶黎元罷望歲之憂臣等中賀伏願陛下凝神保和頤
情養壽復魚庖之舊膳進鶴頂之常羞使芝英有駐液
之期蓬蒲知送涼之地則光天之下率土之濱孰不欣
戴孰不幸甚微臣等幸逢休運預沐恩波混虞獸而同
歡比齊禽而累忭無任悚荷之至謹詣朝堂奉表稱賀
為皇太子賀甘露表 崔融

臣聞五材並用天地合而凝津四序遞來陰陽和而灑
潤望之成雪若墜崑崙之山嘗之則甘似降軒轅之國
伏惟天皇部元氣平太階正圭表於都畿考銅櫨於宮
室薦河圖而升洛範日載祥編過竹苑而憩芝臺宵零
瑞液爾其塗塗被物滴滴流膏承以玉杯凌漢宮而擅
美獻之瓊爵掩魏殿而稱珍可以致靈僊之寄可以延
帝王之壽孝經援神契未足敘其和平春秋運斗樞不
能議其清濁臣濫膺國本多慙人望仰宸遊而不及倍戀

恒情聞帝澤而先驚慶深常位無任喜抃之至

皇太子賀芝草表

高宗

崔融

臣某言伏承某月日芝草生於乾元殿瑞命天來符祥
日至煌煌三秀分芰井而攢柯曄曄九光間梅梁而吐
葉晉都宮閣何必靈芝之臺洛邑山川居然密芝之地
伏惟天皇天臨海內帝有城中蕪漢制而宅兩京用堯
心而加百姓神精下降洽至道於丘陵靈液旁霑被深
仁於草木觀其如蓋如閣如日如星得五方之氣象合

四時之景色仙人在上則車馬疑飛神龍居下則風雲
不去謂蓬瀛之海列即崑閬之山開魏皇之雙榦莫傳
漢帝之九莖為方可以薦郊廟可以觴公卿臣謬踐儲
闈祇膺守國不獲親承左右日覽休徵雖玉屑延齡在
神仙而可致而刀圭入膳視朝夕以猶賒是用心馳仁
壽之前慶集肅成之下無任抃躍之至

皇太子賀嘉麥表

崔融

伏見雍州司馬徐慶稱所部有嘉麥一莖六穗纖芒濯

露疑因黑壤之宜香稼搖風若吐黃金之色豈非靈心
昭應睿德感通降之自天何必來麴之詠嘗之於廟先
符孟夏之時凡在含生相趨動色臣謬當居守肅奉宗
祧一穗兩岐徒說張君之詠十畝千石方輕汜氏之書
仰天意而增歡顧人心而載躍無任喜抃之至

代家奉御賀明堂成表

崔融

臣某言臣聞昭昭上天五座列降神之府赫赫中國几
筵開布政之宮自軒皇肇制帝堯嗣作厯虞夏而惟新

在殷周而克壯斯在尊祖配帝從時統天節寒暑而吹
律順陰陽以班令降及有漢頗採前章雖年惟屢豐而
日不暇給過此以往寂寥無聲伏惟天冊金輪聖神皇
帝陛下興復舊邦光啓新邑萬物覩而聖人作百寶用
而神靈滋遠肅邇安功成道洽泥金刻玉紀脩中嶽之
儀乘鸞駕龍更葺正陽之禮乾策坤策具稟宸聽左个
右个親承獻式朴略淹中莫能言其制度崎嶇汶上疇
克效其規模土事不文木事不鏤九柱自立豈藉瑯琊

之飛二石潛開寧煩穀城之採版築星奔而化造斧斤
風動而神助聖有通於上帝產無費於中人由是日抱
紅輝雲叢紫靄霜毛下翥電翼羣飛夕見神光似對
莊嚴之國晝聞仙響疑過數樂之天匪日而成衝霄特
起仰浮圓笠俯鎮方輿金鸞驚而將飛玉驪龍而若動
三辰引曜相望於複道之間六氣氤氲旁魄於重檐之
半可以發大教陳盛容會百神朝萬國比二儀而永固
齊四序而偕行允所謂穆穆皇皇巍巍蕩蕩者矣微臣

攀光日用荷蔭天休仰之不逮雖謝於鵬翔成輒相歡
竊同於燕賀手舞足蹈倍百恒情無任悚躍之至謹奉
表稱賀以聞

太宗高宗之世屢欲立明堂諸儒議其制度不決而
止及太后稱制獨與北門學士議其制不問諸儒垂
拱四年二月毀乾元殿以其地作明堂以僧懷義為
之使凡役數萬人十二月成懷義以功拜左威衛大
將軍梁國公

進九成宮頌表

王勃

帝機無朕道洽則時雖靈化不言功成則頌顯伏惟陛下體元纂極模神建墜棟梁一氣庭堦六合松軒夜警杳冥姑射之心茅殿晨凝寥廓峒山之駕臣霑風太上庇影華胥仰衢室而無階候襄城而有地雖望卑平叔空勒景福之詞而文謝子雲願竭甘泉之思謹憑天造輒上九成宮頌二十四章攀紫墀而絕望叫丹闕而累息

勃字子安文中子之孫麟德初對策高第未及冠授
朝散郎數獻頌闕下沛王召署府脩撰是時諸王鬪
雞勃戲為文檄英王雞高宗怒曰是且交構斥之勃
既廢客劒南聞號州多藥草求補叅軍荷才陵藉為
僚吏共嫉官奴曹達抵罪匿勃所懼泄輒殺之當死
會赦除名父福時坐勃故左遷交趾令勃往省度海
溺水瘁而卒

為齊州父老請陪封禪表

駱賓王

臣聞元天列象紫宮通北極之尊大帝凝圖玄猷暢東
巡之禮是知道隆光澤既輯玉於雲臺績幼裡宗必塗
金於日觀伏惟陛下垂乾握紀纂三統之重光御籙登
樞應千齡之累洽故得河浮五老啓赤文於帝期海薦
四神奉丹書於王會瑞開三脊祥洽五靈既而緝總章
之舊文紹辟雍之故事非煙翼軫移玉輦於梁陰若月
承輪秘金繩於岱嶽臣等質均芻狗陰謝桑榆幸屬
堯鏡多暉昭餘光於連石軒圖廣運追盛禮於樅金然

而鄒魯舊邦臨淄遺俗俱穆二周之化咸稱一變之風
境接青疇俯瞰獲麟之野仙開翠屺斜連辨馬之峰豈
可使稷下遺氓頓隔陪封之禮淹中故老獨奏告成之
儀是用就日披丹御壁輪之三舍望雲抒素叫天闔於
九重儻允微誠許陪大禮則夢覺餘息仰仙闕以相驩
就木殘魂游岱宗而載躍

賓王義烏人七歲能賦詩初為道王府屬嘗使自言
所能賓王不答裴行儉為洮河總管表掌書奏不

應調長安主簿武后時數上疏言事除臨海丞遂從
徐敬業起兵敬業敗被殺或言賓王為僧以遁近有
人發得賓王墓者乃知賓王實不死且未嘗為僧也
事詳湧幢小品中

為陳御史進奉和秋景觀競渡詩表

陳子昂

天文爰降品彙咸亨金簡潛開珍圖斯見臣聞白雲興
詠漢游汾水之祠黃竹申歌周舞瑤池之駕然而志崇
遠轍事或勞人故文思之化未光太清之道猶闕伏惟

陛下流虹齊聖感月含神玄德茂於皇階文明照於天下用能提玉斗把璿衡百神景從三靈叶贊青雲出洛爰開肇命之符赤甲紫河終御興王之寶非窮神之至德者其孰能格於是既而黃幄務閒紫極幾暇洞庭張樂思接軫於軒遊媯水披圖想同叅於堯輦然而遠而勞物未若近而安人動而勤已豈比靜而神泰於是徙金蹕鳴玉鸞清禁林御池殿肅波臣而戒事命舟子為水嬉彩鷁蓮歌乍起吳江之引青龍桂楫時謳越女之

風鳥逝蚪驚沸珠潭而競逐雪飛電集橫玉浦而流光
信可以娛樂性靈發揮文物皇猷允洽白日俄輝於是
奏薰風於管絃詠嚴雲於林籞帝歌爰作天藻遐彰黼
帳帷宮燦文房之繡綵祥煙瑞景霏翰苑之榮光信探
蹟於玄苞得斯文於紫極太平允矣元首康哉方欲朝
明堂之宮輯羣后之瑞尊榮顯錄光啓聖圖封玉嵩丘
以接千年之統泥金少室攸增萬歲之規卓哉煌煌聖
君之表也微臣曲學蓬戶竊位蘭臺未聞馳馬之謠非

有雕龍之思鞠躬霜署謬覩於天章逖聽鈞臺廁聞於
帝樂天文尊貴不遠於下臣帝保殊崇曲宣於近侍竊
以為君唱臣和固不隔於尊卑宮變商從方允諧於金
石輒用齋心扣寂假翰求詞將以攀日月之末光繼螢
燭之微照

子昂字伯玉梓州射洪人以富家子尚氣決弋博自
如十八入鄉校感悔脩飾舉進士垂拱中勸武后興
明堂太學后既改號周子昂上周受命頌后雖召見

問政事奏聞輒罷以右拾遺父喪廬墓為縣令段簡
所殺沈亞之云武三思使之也然新舊史皆不明著
其事

為王方慶讓鳳閣侍郎表

李嶠

恩寵光臨獎詞踰分虔荷明命營魂失守臣某

中謝

臣

學非儒墨術異商韓文乏斧藻藝慚刀筆屬乾坤貞觀
日光輝飛龍在天而庶物咸覩僊兔離畢而羣萌皆
潤遂得封殖樗散謬齒於翹薪剪拂駕駘濫陪於逸驥

驟荷私遇頻階榮擢入參丹閣出擁彤駟爰自海邦遂
升河輦佩若若之綬舊駟駟之轂叨恩竊幸空變星霜
尸祿妨官曾微報効宜受素餐之責翻成黃閣之榮夕
拜瑣闥朝陪禁省敢希任光淑睿之美每憂王歆謬誤
之失而天慈逾渥聖澤無涯爰迴斗極之暉更寵掖垣
之授下神畿而入仙禁未變葭灰自鸞渚而游鳳池僅
凋棠葉荀侯之十旬累命未可為儔車公之一月九遷
曾無足比既超倫而邁等實負愧而承羞臣亦何人敢

叨非據况樞秘之重絲綸是職言叅玄化步入紫微臣
蒲柳既秋桑榆漸迫耄期云及衰疾徂侵以日昃之歌
當夜行之罪招愆叢謗非為身謀敗駕傾餽將貽國
負盖力周於用則輕重咸宜任過其才則巨細同躋伏
願察臣知止之分矜臣自量之情杲然出日迴三舍之
光油然而作雲垂九霄之澤曲收過謬改命才賢則維鵜
之譏不起於輿誦振鸞之詠復聞於朝端

嶠字巨山贊皇人武后時為鳳閣舍人文冊大號令

多主為之二張敗坐貶神龍中為中書令封趙國公
嶠在中宗朝密請相王諸子不宜處京師玄宗即位
獲其表欲誅之張說救得免貶別駕卒嶠少為文與
王勃楊炯接中與崔融蘇味道齊名後諸人沒而為
文章宿老學者取法焉

王綝字方慶其先自丹陵徙雍咸陽武后時為廣州
都督清嚴為天下第一遷鳳閣侍郎同平章事后嘗
就求義之書方慶并獻十一世祖導等書凡二十八

人詔崔融為序號寶章集復賜方慶卒諡曰貞方
慶博學尤精三禮李德裕嘗稱方慶為相時子為眉
州司士叅軍后曰君在相位何子之遠對曰廬陵是
陛下愛子今尚在遠臣之子庸敢相近以比倉唐悟
文侯事嗟乎君子哉

為百僚賀雪表

李嶠

臣聞至道光被而冲和感發玄化沈潛而祥物昭應伏
惟陛下合德天地齊光日月陶正氣之氤氲降元符之

盼蠻用能經緯六合驅馭百靈垂旒法宮而品物清宴
揆景中土而風雨休若三元肇革九陽初動撞黃鐘而
布氣順玄冥而率職層陰候律豐澤順時蒼蔚方興起
泰山之膚寸參差薦委自平地而盈尺銅街皓其如素
金隄紛其遂滿縈樓棲檻疑壁臺之九重落絮飄花似
芳林之二月豈惟洛神呈象來舞帝宮故亦海騎相趨
下朝仙闕東臯欣而望歲南史慶而書祥萬寶登秋
居然可詠雙銅叶唱即事非遙自非睿感通微乾心輔

德降神靈之滋液發兆庶之歡慶臣等恭承玄造沐浴
太和欣聖澤之滂沛對天休而踴躍

在神都留守請車駕還洛表

李嶠

臣嶠等言臣聞天下皆春而燕谷有析暄之律日中並
照而彭澤有隨陽之禽豈非承光飲和仰德蒙庇深於
戀者其往若不親渴於求者其來如不足所以圭表既
宅闕河馳願思之誠鑒和未巡襄鄧切謳歌之慕帝車
北指震駕西臨槐檀方厯於四時菁莪猶掩乎八水者

老延頸簪裾企望戴天有分徒嗟京兆之遙捧日無階
竊恨長安之遠臣等伏以載祀七百卜年非豐鎬之地
時乘九五啓聖由瀍洛之鄉所以受龍圖龜書所以朝
雨師河伯叶祥符於讖錄採謀議於人鬼萬靈幽贊百
物阜昌是曰天地之心實興帝王之祚方使四夷為守
西賓屈無外之談六合為家東土壯居中之業况復園
丘方澤神祇之兆域以安複廟重檐昭穆之尊卑既敘
定社而立稷建邦而設都是萬年長王之郊誠億載不

遷之宇寧可久曠中壤即安偏據詠山河於漢舊訪宮
室於秦餘五載時巡曾無告至之禮四方述職仍有不
均之患臣等庸愚竊所未達今三秋告稔萬寶已成陰
陽所和稼穡偏茂却連澤潞斜帶荆揚萬庾同殷千箱
並阜禾萌九穗未曰休徵穀石五錢詎名豐穰加以舟
車並輳水陸交衝物產尤多觀聽胥悅衆庶有來蘇之
冀神靈翹望幸之心伏願陛下俯察氓謠仰祇天意因
銅雀之稔歲命玉鸞之僊軫涓時擇日屯萬騎而出函

秦省俗觀風撫四方而還輦洛逍遙乎九阿之阻容與
乎八表之路迴輿駐蹕觀日月之圓場闢續凝旒問百
年之疾苦然後歸輅禮乎九廟明堂衆星拱列長居辰
極之尊萬寓駿驅載詠朝宗之府光輝將日月齊殷德
澤與江河並潤致乾坤之景福盡億兆之歡心凡在人
祇孰不欣幸臣等限以所守不獲親詣闕庭無任區區
之誠謹附洛州奏事使陳請以聞

武后光宅元年改東都為神都

四六與詩相似皆着不得議論宋人長於議論故此
二事皆遜唐人唐人非全不議論也但其議論有鏡
花水月之致耳如此篇一起亦是議論還可聲色臭
味求否

讓鸞臺侍郎表

李嶠

仰荷聖澤退揆愚衷周章失圖怵惕惟厲

中謝

臣聞疇

德而授則尸曠之譏絕推恩而舉則緝熙之道廢臣志
狹量淺業空理疎揆才異言行之科入仕非廉高之選

邀屬時幸累叨榮級石渠麟閣司典籍之林金門鳳池
叅廟堂之議以小才而居大任用近智而恢遠略緣鶴
之鼎既失於鹽梅濡鵜之才實慚於紱冕甘待素餐之
責忽承非次之恩夫以瑣闥崇嚴玉堂秘近職叅持蓋
位亞掌壺子雲以善屬文詞始應夕拜李真以妙通經
術方陪旦講臣之愚陋實畏友朋豈足以奉帷幄之昌
言聯名賢之逸軌且短才不齒未減雙鳬之數豐稊安
加必喪羣龍之績陛下經緯品物搜揚管庫方便道風

德範遠出帝先豈令敗政妨官近自臣始伏願俯收人望顧惜朝班特迴寵光改命賢俊則百揆寅亮長無鼎覆之憂三階底平自有棟隆之吉

唐自武德以後官名更改不一如一門下省或稱東臺或稱鸞臺或稱黃門其侍中或稱左相或稱納言一中書省或稱西臺或稱鳳閣或稱紫微省其中書令或稱右相或稱內史或稱紫微令

為水潦災異陳情表

武后

李嶠

臣嶠言臣聞明主程才先求於稱職忠臣效用必務於量已然後庶官無廢百度以康若使假鳳登朝真龍不馭將緣鶴之鼎方憂於折足和鸞之駕必誠於傾軛豈徒鐘鼓生妖蠻夷起笑而已臣瓶甗賤器駕蹇輕姿同鼯鼠之五伎不成異飛鴻之六翮無備遭逢幸會累叨階級陛下降非常之澤垂不次之恩升之冢司握九流之銓管委以樞近叅萬幾之損益傳說作舟之命徒奉箴規仲山補袞之談曾微答效致令衡鏡失序紀綱不

張官僚日增府庫歲減謬職之謗或譏於畫虎續貂敗
官之尤有議於誼盧吠鵲下生朝野之蠹上悖陰陽之
和水潦為災慮深於昏墊黎氓失稔憂在於溝壑軫皇
情於南面墜國庾於西城虧變理之則失平分之度推
其咎戾實在微臣昔者堯逢阻饑而四岳咨訪漢遇災
異而三公策免舉遺才而求俊入退不肖而清庶官厥
有由來著於古昔臣緝熙莫效尸曠無成以擁腫之凡
材抱支離之痼疾久懷致寇之祿猶帶妨官之綬覲目

而視不遑自安是用啓處慚惶寢興誠惕思解鵜鷺之
服願辭鵜鷺之行庶得保愚公之廬避賢者之路以寧
衆口之囂謗以答三靈之譴咎則物情朝序誰不謂宜
昔干木辭第恒思衛生營平寢瘳不忘憂國當今兵戎
未靖費務方多人庶空虛官僚苟且不可不深為防慮
妙思政術臣銜恩佩德念舊慚榮雖智效無聞自甘於
罷黜而庸短所見猶樂於輪畫幸當明主不諱之朝敢
效愚臣無隱之節倘蒙赦其猖直收其固陋乃冀有益

織芥效添山海

為納言姚璿等謝勅賜飛白書表

李嶠

臣璿等言今月十一日侍宴蒙恩作飛白書題臣等名字垂賜跪承寶貺仰戴瓊文如披七曜之圖似發五神之檢九霄靈澤與垂露而同霑千載嘉祥共迴鸞而並集冠六文而首出掩八體而孤騫渺乎若遊霧之拂春林靄乎似輕雲之上秋漢頡皇之始模蟲篆未足多竒劉后之嘗學史書孰云能擬固已工踰懸帳妙盡刻符

鍾繇竭力而難比伯英絕筋而不逮則知乃神乃聖包
衆智而同歸多藝多才總羣方而兼善諒天機之獨運
豈凡識之能窺臣等才埒瓶甗任叨衡石器滿之誠每
切於愚心棟隆之吉實慚於明代而大慈曲獎聖造不
遺厚祿尊官既殫恩而極寵良辰美景又申歡而接宴
慶方行而已及澤未溥而先加殊恩與骨肉等深緼禮
共衣冠相絕今復親陪睿賞特流宸翰羸氏之魂遊天
上未比超昇闕生之名在月中詎方遐邈昔者韓稜深

博肇蒙於署劔田鳳名流僅聞於題柱未有芝英草聖
近縟於綵牋合璧連珠俯光於掌握在臣叨忝獨冠古
今方且示彼記言傳諸貽訓表一人之殊寵留百代之
榮觀手舞足蹈徒申踴躍之心摩頂至踵豈答生成之
施

璫思廉之孫武后時擢夏官侍郎坐從弟叛貶桂州
長史璫取山川草樹名有武字者以為上應國姓裒
類以聞后悅拜天官侍郎歷遷至地冬二官尚書

為李景謨讓天官尚書表

李嶠

寵命載臨震悸交集鞠躬自覲屏營無措

中謝

臣聞俊

入在官百揆所以時叙名器妄假九流於是咸曠事闕
隆替義難忝越臣才疎行缺學淺智空十舍無千里之
資一經乏三冬之教徒以遭逢昌運始因藉時幸雨露
之曲成遇山川之廣納遂得差肩冕笏比跡流品出入
臺省周旋階闥鏘金鳴玉坐榮枯朽擊水搏風顧慙腹
背自忝司衡鏡亟易星輝雖智力已窮而清通未效朱

紫多紊涇渭莫辯宜其抵罪觸罔稍清官謗翻乃假寵
增服更垂天獎是用荷恩內訟以榮為憂且夫八座位
隆五曹望重典南宮之喉舌象北斗之樞機式資藻鑑
奚綜賓實自非孝先亮直彥輔公忠山濤之簡靜篤素
顧譚之心精體密何以對揚天哲厭塞人望顧斯政本
實總國彝豈臣庸愚所堪尸忝伏願迴光寢照返汗收
恩察臣由衷之請矜臣陳力之議則朝端允穆天下至
公四始輟在梁之譏六爻無負乘之累矣無任慙懼之

至謹詣朝堂奉表以聞

李景謏嘗以鳳閣舍人証裴炎反旋同鳳閣鸞臺平

章事

謝臘日賜臘脂口脂表

李嶠

伏以安寧戒序嘉平在節白日臨於陽谷繁霜入於露
寒蘅林始停桂筵豐暇青牛帳裏未輟鑪香朱鳥牕
前新調鉛粉因三冬之吉慶造六宮之脂澤糴之以辛
夷甲煎然之以桂火蘭蘇氣溢象奩香衝翠握光金

屋之僊鄉賜瑤房之帝嬪南國容華之人從來未識西
京妖冶之妾何時可見臣等叨膺天恩脩總留臺雖天
動星迴暫違於侍從而雲行雨施更延於恩渥猥承郵
驛曲賜絲綸分八子之膏腴及三臣之瑣賤竊窺明鏡
已覺衣冠之不任旋顧粧奩遂成箕箒之多幸身輕塵
露佩德空深貺等三山殞身何答

吳曾漫錄云景龍文館記三年臘日帝苑中召近臣
自北門入於內殿賜食加口脂盛以翠碧鏤牙簫子

美臘日詩云口脂面藥隨恩澤翠管銀罌下九霄王
建宮詞云月冷天寒近臘時玉街金瓦雪漓漓浴堂
門外抄名入公主人家謝口脂皆言臘日賜口脂也
○起處全用徐孝穆

為王及善讓內史第二表

李嶠

臣及善言臣叨荷殊私冒陳至懇而惕慮昏於凡識深
誠蔽於短辭丹墀罔通紫泥徒渥祗奉還答周惶失措
中謝
臣才疎行缺運偶時來榮匪德遷官由恩達法河

象嶽升臺厯府行叅八命坐陟九霄彤軒皂駟非振鷺
之飾青組丹紱是濡鵜之譏施重丘山效微涓滴妨賢
自久速謗滋深頃因齒髮之衰得蒙骸骨之賜西河退
老非翫經書東海歸閒空求藥餌方養支離之疾翻成
愷悌之恩曲降絲綸重收簪履徵榮槁木責煥寒灰將
使策蹇磨鉛入總樞秘牽羸引僊叅典鈞石仰朴恩渥
顧探心摧桑榆且晏蒲柳先秋方與絳縣老人論其甲
子淄川艾耄比其容貌將何以對敬金展趨奉玉墀當

鳳沼之便蕃望龍闈之親切况寅亮至極經綸帝道功
叅濟巨義等作霖隆替是因具瞻斯在永言授受豈當
容易是用深鑒陳力載懷天造每憂折鼎乞保懸車
且今百度惟貞九流式序鵷鴻齊列俊乂在官可使畫
虎承羞豐貂竊幸謬中孚之好爵辱大雅之能官伏願
深惟至公俯收曲澤於此疲劣改命才賢則器滿之凶
不累於愚叟棟隆之吉永光於聖代

及善洛州邯鄲人以父死事襲邢國公高宗時厯春

官尚書秦州都督致仕武后延問朝政及善陳治亂
所宜后悅拜內史廬陵王之還密贊其謀二張怙寵
每侍宴無人臣禮及善數裁抑之后不悅遂乞骸骨
改文昌左相卒年八十二諡曰貞

為臨川王讓千牛將軍表

李嶠

臣學藝無稱才行蕪闕幸延茲蔭遂厯通班花萼同榮
依上林而發彩鵲鵲交集仰大厦而相歡恩比丘山效
微塵露叨榮席寵荷愧承羞臣某夙奉皇明已忝銜

珠之秩兄某近承天澤又當執金之位弟兄齊列伯仲
分曹咸典禁戎比叅宸衛匪惟官崇祿厚思滿盈而增
憂固亦秉勢操權顧章程而自惕况臣素抱愚拙更纏
疴恙牽羸引憊竊位妨賢內懷尸素之慚外負朝廷之
謗豈可以多塵聖化久累能官伏乞收迹丹墀歸骸素
里庇堯雲之光彩浴舜海之波瀾柳蔚桃濃聽南鄰之
鐘磬茅舒桂滿陪北闕之簪纓餐厚渥而忘饑樂太平
而愈疾則涵養之德瞻大造而斯弘覲冒之譏在微臣

而知免輒陳固陋輕黷威嚴授紙彈毫驚魂悚惕

為公主辭家人畜產官給料表

李嶠

妾聞賢相防微格盈門之車騎通人酌損忌滿堂之金玉尚于平之讀易富不如貧孔宣尼之立言奢也寧儉永言故實此為明鑒妾等並承靈坤載荷蔭中樞或天妹申慈忝扶桑之瑞萼或王姬藉寵竊竊穠李之奇秀開沁水之園苑賜常山之湯沐勝懸金字分衢離巽之宮路夾銀河並列星辰之位通秘籍於龍廷之內枉僊輿



於鳳樓之下殊私曲獎以日而繫年緝禮崇徽夸令而
邁昔兼復別隆朝旨猥存家務輿臺供隸之衣食棧旣
泰牢之秣養並迴中府俱出太農聚終歲之儲但憑絲
紱供闔門之費不煩機杼仰祇鴻澤退省微躬生以地高
徒竊雲霄之幸寵非德進曾微纖芥之勞何義而虛受
渥恩何功而謬延賞賜是用每積慚悚常憂顛沛敢忘
周公逸豫之誠深念老氏止足之言乞留聖慈俯鑒愚
懇使榮無過腆滿不至溢國邑田租之常料既已豐殷

馬牛陪隸之雜供並希停減庶得無耗府實稍清朝謗
長轂遠馭不逢於致寇之人高門洞開無怯於害盈之
鬼

代公主讓起新宅表

李嶠

臣妾言伏承聖慈以妾居處褊狹欲開拓宅北更起新
第恭聞睿旨不勝慙惕陛下骨肉之愛天至而溟深敦
敘之風日隆而月厚乃復推心連萼結念同胞方欲廣
沁水之庭除增常山之版築雖殊恩曲獎惠澤實浸於

肌膚而妨公害私謗訕恐盈於道路況臣妾承靈天妹
藉寵王姬輿服亞於椒宮土田方於茅社甲第之當衢
向市並列三區別廬之帶水連山將盈萬畝深埒則可
乘騏驎高樓則唯待鳳凰常憂瞰室之易災實懼滿堂
之難守寧可更求輪奐別構崇深擾閭里之忙黎傾國
家之府藏且鬼神所福常矜於缺隅賢聖垂箴必誠於
豐屋孫叔辭良沃之土晏嬰求湫隘之居妾雖愚蒙頗
聞訓典實願歸師老氏以止足自防仰慕周公將逸豫

為戒但希安分於容膝非敢攀榮於潤身且坊為要衝
地當貴里畝債二三十貫居人四五百家奪其近市之
門閭生其破家之怨讟雖下人之不語豈愚妄之能安
又妄之平生每存捨施屈身濟物心所願為益已害人
情豈能處今麥苗雖盛穀價未豐家少糧儲人多菜色
但可勸耕耘之業未宜興土木之功伏乞俯察愚誠傍
詢衆望體東作之尤加知西第之非急收茲霈澤惠彼
黎烝則天下蒼生孰不欣幸無任慳款屏營之至謹遣

某官詣朝堂奉表陳情以聞

即此二表想見太平主輩濫恩當此昏亂之時而國用饒裕如此此非有他術只是無漏卮故耳

讓右丞相表

張說

恩命自天戰跼無地

中謝

臣少長儒門懇鑿墳史才非

高格官不因人徒以命偶龍興位偕鴻漸五入西掖七踐南宮中間拙延謫放直招玷缺傷矢之禽聞弦虛墜賜環之客聽歌先泣此則魂為危感氣由懼奪安可重

收廢器再辱端揆何以師長禮聞正持憲府當今典章
革故風教鼎新野無四隱朝有三傑具瞻之地願擇時
髦臣幸沐遺簪墮履之恩好生養老之德朝遊簡牘暮
對圖書受賜無涯循榮過分豈更干處士之橫議招凶
奴之謫哂艾涇自瘡負乘致寇雖則愚情懷戀覲冒求
寵亦望聖慈限恕令度餘年願停令授長守舊史罄陳
肝膽非敢飾讓

張說字道濟玄宗在東宮說為侍讀時太平公主不

利於太子說所與密謀秘計甚衆又勸睿宗命太子
監國以塞讒口篇中所謂命偶龍興云云也玄宗朝
起仆出入不常嘗為姚崇所短謫岳州為宇文融所
誣被鞠所謂拙延謫放云云也

進鬪羊表

張說

臣聞勇士冠雞武夫戴鶡推情舉類獲此鬪羊遠生越
舊蓄情剛決敵不避強戰不顧死雖為微物志不可挫
伏惟陛下選良家於六郡求猛士於四成鳥無遁林獸

不藏伎如蒙效奇靈圓角力天塲却鼓怒以作氣前躑
躅以奮擊趺若奔雲之交觸碎如轉石之相叩裂骨賭
勝濺血爭雄敢毅見而衝冠鷙狼聞而擊節冀將少助
明主市駿骨揖怒蛙之意也若使羊能言必將曰苦鬪
不解立有死者所賴至仁無殘量力取勸焉臣緣損足
未堪履地謹遣男駙馬都尉埜謹詣金闕門陳進輕冒
宸嚴伏深戰越

說為相時玄宗欲事吐蕃說密請講和以休息郵塞

帝曰朕待王君臭計之說出曰君臭好兵以求利彼
入吾言不用矣後君臭破吐蕃於青海西說策其且
敗因上鬪羊表帝識其意賜綵千匹後瓜州失守君
臭死焉

謝賜香藥面脂表

張九齡

臣某言某至宣勅旨賜臣裒衣香面脂及小通中散等
藥捧日月之光寒移雪海沐雲雨之澤春入花門雕奩
忽開珠囊暫解蘭薰異氣玉潤凝脂藥自天來不假

淮王之術香宜風度如傳荀令之衣臣才謝中人位叅
上將疆場效淺山嶽恩深唯因受遇之多轉覺輕生之
速

張公字子壽韶州曲江人中書令貶荊州長史久之
封始興縣伯卒諡文獻

三月三日為百官謝賜宴表

宋璟

伏以漢崇元己齊曰上遊咸聞執蘭以盛襍飲洛水之
會囂呼不足紀也永和之遊僻陋不足追也臣等生逢

多幸遇會聖明賜與榮渥逾溢涯分詢於史策超軼古

今


中謝

伏惟皇帝陛下屈已愛人布和施恩慶賞所及

萬國歡心財成之道與天悠久爰以令節錫宴公亭翠
帝文茵俱來天上嘉餚清醕亦自大官欣懽之聲決於
億兆銜感之至形於頌歌而天心霽然宸章煥發曲蒙
賜示捧讀兢懼涵泳五音光輝二雅流於篴磬永播無
窮豈臣庸愚詎能思度今狂虜衰息年穀屢登俗被
湛恩人歸壽域讌遊高會適助時康况上宰冢卿脩

簪長劒前後羅列小大相從所以序聖朝之多士為百代之風流臣等叨榮無任懇迫報効何日進退知慚不勝欣忭之至

璟邢州南和人累封廣平郡公尚書右丞相卒諡文貞○廣平公文僅此篇尚存近有偽作梅花賦刻文致中不可不辨然亦不足辨也



四六法海卷二